

B. N. C.
FIRENZE
1060
23



PANEGYRICVS
SERENISSIMO PRINCIPI
AC DOMINO

DN. GEORGIO
WILHELMO

DVCI BRVNSVIC. ET LY-
NEBURG.

VICTORI
TRIUMPHATORI

CÆSIS AD MOSELLAM GALLIS
EXPVGNATA TREVIRI
DICTVS

AB

HENRICO MEIBOMIO.



Helmæstadl,
Literis Henrici Davidis Mülleri Acad. Typ.

Anno M DC LXXVII.



PLINIVS JUNIOR

Lib. iv. Epist. xii.

OMNES, QVI GLORIA FAMAQVE DVCVNTVR
MIRVM IN MODVM ASSENSIO ET LAVS A
MINORIBVS ETIAM PROfecta DELECTAT.



ILLVSTRI EXCELLENTISSIMOQUE
DOMINO

DN. JOHANNI HELVICO
SINOLD

COGNOMENTO *Schütz*

SERENISS. BRVNSV. AC LYNÆB.
DVCIS CONSILIARIO INTIMO
ORATORI ET CANCEL-
LARIO &c. &c.

DOMINO AC PATRONO SVO
DEVOTISSIME COLENDO

HENRICVS MEIBOMIVS

*SALVTEM ET OBSERVANTIAM
PERPETVAM.*



Uem superiori anno, ipso sacrae festivitatis die, SE-
RENISSIMO PATRIÆ PATRI, VICTORI;
TRIUMPHATORI, Panegyricum in totius
Academiae conspectu dixi, cum nunc recensitum in
publicam lucem produco. Sanè, cujus HEROIS
excelsæ virtuti marmora & statuas non Mosellæ
tantum accolæ, sed universa Germania debet, illum memorari po-
steris omni facundiæ genere par utique est, sed illa præsertim, quæ
numeris

numeris instructa aliquid præ se fert divinius. Hoc ego in Ducali Academiâ solus ausus fui, non, qui id posset quàm optimè, sed qui vellet quàm maximè: non ingenio aut doctrina confusus, sed vel publicæ felicitatis argumento placiturus, vel instituti pietate veniam meriturus: illa intetum usus calami, non mordacis, non insultantis, moderatione, quæ nec ipsis hostibus ingrata esse poterit. Si enim illis victis laudes meritas lubentes tribuimus, nobis certe victoribus nostras non negabunt; & quàm gloriosum nobis est, Gallos vicisse, tam honorificum illis erit, à solis Germanis potuisse vinci.

Tibi vero, ILLVSTRIS ET EXCELLENTISSIME DOMINE, hic Panegyricus sacer esse voluit, debuit, cui non minus vigiles noctes, quàm in excubiis militibus, publica salus peperit. *Parvi sunt foris arma, nisi sit consilium domi*, inquit præclare Cicero. Certè, magnitudinem rerum, quæ difficillimis his temporibus agitantur, propius intuentes non possunt aliter arbitrari, quàm fato quodam, seu divina benignitate Te his terris datum, ut & illis periclitantibus succurras, & illustriorem virtutem Tuam Germaniæ pericula reddant. Scio majora Tibi debuisse offerri, & hoc carmen infra meritorum Tuorum magnitudinem esse: sed & Tibi, ILLVSTRIS DOMINE, ea imprimis placere, quæ ex devoto erga PRINCIPEM & publicam salutem animo proficiscuntur, optimè novi. Servet DEVS OPT. MAX. Serenissimum Principem GEORGIVM WILHELMVM, divinæ erga nos clementiæ certissimum pignus! Servet Te quoque, ILLVSTRIS DOMINE, ut perpetua EIVS indulgentia lætus, non tantum SERENITATI IPSIVS, sed toti Germaniæ pari impofterum zelo, pari successu Tua salutaria consilia devoteas, consecresque! Helmæstadii. In Acad. Julia. Idibus Februar, MDC LXXVI.



Andem iræ patuere Dei, Nemesisque
quietem.

Turbatam, excisasque urbes, concus-
saque latè

Terrarum spatia, incensumque ulciscitur orbem,
Stat Celta attonitus, ceu quem Deus igne corusco
Terruit, obliqua præstringens lumina flamma.
Parte alia validos jam fortius explicat ungues
Fulminiger Jovis ales, & illa antiqua potentis
Teutoniæ virtus, nunquam moritura, triumphat.

Tertius exactis completur mensibus annus,
Ex quo Gallus acer, quem pars cultissima mundi,
Sequana quæ Ligerisq; colit, rapidusq; Garumna, &
Rhodanus, Allobrogum qui per montosa vagatur,
Per pacem resides populos, desuetaque bello
Agmina in arma vocat. Coeunt cū Vascone Santo,
Aulercique Heduique viri, dudumque Gradivo
Narbo sacer: fremit arma Rhemus, fremit arma Ca-
durcus,

Et Biturix, Senonesque, & pictis Lingo catervis.
Non tamen ipse sibi, non fecundissima regna

A

Suffi-

Sufficiunt, toto qui pugnent orbe leguntur,
Et sua Germanus male cautus robora mittit,
Et sua Sabrina, & Tamesis, lentusque Tueda,
Et gravis Helvetius, sociataque regna sub Arcto,
Et domini Hesperiae, & cognata gente Sabaudus.
Non unquam tanto coëerunt agmine gentes,
Divisæ patriis: nunquam mage fortia quisquam
Pectora produxit, nunquam mage cognita Marti.
Rex præit. Illum ingens gestarum gloria rerum,
Tot palmæ, laurique, & tot super hoste triumphi,
Captivique Duces, & vinctæ colla cohortes:
Illum audens animus, vigor igneus, enthea mentis
Vis, & inexhaustus labor, & spes alta, polique
Insolitus favor, & ventis fortuna secundis
Ad summum vexere apicem: jam maximus audit,
Occiduique orbis terror, & terror Eoi.
Si tibi mens inferre Getis lacrymabile bellum,
Euxinique truces, longæque Propontidis undas
Armata transire manu, ne barbarus urbi
Ulterius Solymæ, atque Eois imperet arvis;
Vade age, & ingentem factis fer ad æthera Martem,
Majores imitate tuos: mox nubifer Hæmus,
Mox Rhodope, mox altus Athos tibi serviet uni,
Et Franco sermone loqui sibi dulce putabit

Græ-

Græcia, & Eois LVDOVIX dominabitur oris.
Centum urbes habitant Turcæ, ditissima regna,
Littus arenosum Lybiæ, penitusque repostas
Massylum gentes, Phthiam, clarasque Mycenæ,
Et viridem Ægyptum, veterum penetralia Regum.
illic & spolia ampla tuo pro milite cedent,
Purpureæ vestes, pretiosaque tegmina Regum,
Et gladii gemmis illusi, auroque pharetræ.
Quid satis est, si Turca parū est? fac, clasibus æquor
Ferveat omne tuis, & Gallica vela paveſcat
Euphrates, trepidusque abstrusa in origine Nilus.

Fallimur? an potius vicinum frangere robur
Æmulus ardeſcit? Jam tum tristissima Belgis
Omina, difficilesque vices, lacrymosaque fata
Cudebant Parcæ: docuit mox exitus ingens.
Quæ fuerat quondam blandæ nutricula pacis
Belgica, dives opum, & multum formosa potentis
Filia Neptuni, facta est vertentibus astris
Scena ferox pugnæ, & miseri domus ardua belli.
Ille viris fidens munitas fervidus urbes
Aggreditur, dedique jubet: pars territa parer
Ante tubam, pars audito terrore ruentis
Submittit sese belli: dat quisque pavendo
Crescenti vires famæ; cum conjuge conjux,

Cum

Cum natis patresque & desolata senectus,
Quæ mens iccta jubet, fugiunt, carosque penates,
Et culti uber agri, & multos congesta per annos
Vix dum conspecto linquunt patrimonia Gallo.
Heu fati, sortisque vices! quæ fortia quondam,
Quæ Tartesiaci contempsit regna Philippi,
Regna, quibus Phœb⁹ nunquã occidit, illa sororum
Fœdere septeno felix, quæ fulmina Martis
Tot tulit, insultusque invicto robore, semper
Armis læta suis, & multis læta triumphis,
Atque ipsis animosa malis, nunc tristis, hebesque,
Uno mense ruens, magno se cernua Regi
Submittit, pacemque petit. Jam scilicet illa
Mitior, oblongoque togæ tranquillior usu
Dedidicit per pacem enses, Galloque ruenti
Diffimilis, contra Ligerim Tamesimque ligatos
Auxilia à lento expectat tardissima Bæti.
Nec tantum toto premit illos corpore regni
Infensus LUDOVIX, alios movet, atque Britannum.
(Plurima pollicitus) trahit in sua fœdera Regem,
Qui terræ metus, & magni formido profundi,
Partitus dudum Nerei cum conjuge fasces,
Invidet Oceanum Belgis, & multa minatus
Hostili infestat trepidantia littora classe.

Parte

Parte alia exciti, & mollissima tempora nacti
Vicini invadunt, repetitque Colonia Berkam,
Et veteres Mimigarda iras, habitusque resumit.
Non latus est, quod ab hoste vacat: bellum, undique
bellum.

Imminet incautis, belloque nocentior ipso
Seditio plebem furiis atque impete magno
Concitat in patres, turbatur curia, & hosti
Consiliis orbata suis dat patria nudum,
Ostentatque latus; duras hinc Mosæ catenas
Accipit, auriferique palustria cornua Rheni
Fracta jacent, tumidusq; timet nova vincula pontus.

Non tulit Austriaca hoc LEOPOLDUS origine
Cæsar,

Occidui orbis apex, & Divis proxima cervix,
Invictus semper belli pacisque sequester,
Teutonici metuens clades, regnique ruinam.
Idem amor accendit Proceres. Injuria toti
Illata Imperio visa est. Non certior unquam
Teutonium fortuna manet, quam singula magno
Si sunt, & capiti conformia membra cohærent.
Tum robur, Germane, tuum vicinia novit,
Teque orbis pars una timet, pars una veretur,
Suspiciuntque omnes, nec Gallia cauta lacescit.

B

Ante

Ante quidem tentare placet, (nam mitia corda
Cæsaribus natura dedit) si dedere sese
Pacis in amplexus, & mutua fœdera poscat
Gallia, fisa suis opibus. Tandem itur ad arma,
Austriacis bene nota, & eunt ad prælia turmæ,
Danubij à ripis, Oeno, Savoque, Dravoque,
Odrysiiis similes, rapidi quas Strymonis unda
Marte duce ætheriis fortes miratur in armis.
Cerno enses validos, & adhuc crudele rubentes,
Sanguine Turcarum madidos. Victricia cerno
Signa, Aquilasq; truces, rapidus quas Vistula quondã
Horruit, & totò timuit vagus Odera tractu.
Nec minus intrepidus ad fortia prælia GVELPHOS
Imperio jurata fides, & conscius ardor
Libertatis agit: cœunt, & fœdere factò
Se propiore ligant; pressæ succurrere parti
Fert animus, patriæque heu! declinantis honores
Asserere, indomitumq; Albim, rapidūq; Visurgim.
Dux præit, infraçtoq; GEORGIUS intonat ore.

Testor in hos campos me invitum adducere
Martem,
Invitum nudare enses, sed tristia tangunt
Vulnera communis Patriæ. Non sævior unquam
Gallia, majoresque animosa exarsit in iras.

Non

Non animus tantum, nutantia foedera Belg
 Frangere, & hinc fractā penit⁹ subungere gentem,
 Sed proferre pedem ulterius, sed corpore toto
 Irruere in nostros diris populatibus agros,
 Nec capulo prohibere manus, nec ponere finem
 Militiæ, Martique modum, Germania donec
 Liligero subdat sua sceptrā potentia Regi, &
 Lugeat indignè raptum Jovis ales honorem.
 O Patria! ô sacri custos Alemannia sceptri!
 Pelle situm senij languentis, pelle veterum,
 Externoque occurre hosti, fac, arma cruentus
 Exuat, & raptas reddat cum fœnore prædas.
 An tandem clades, tandem tua funera sentis?
 Quod nunc semirutis sordent tot mœnia saxis,
 Rarus & Allatis habitator in urbibus errat:
 Horrida quod dumis, & quod viduata colono
 Terra Palatina est, solitum nectarque negarunt
 Vitiferi colles, spectatque incendia Nicer,
 Hæc & densa hominum debemus funera Gallo.
 Poscimus, ah Mavors! ah Mavors! poscimus. Arma,
 Arma, arma, excelsæ mentes! Patientia longa est.
 Spernimur, & nobis titubantibus Ille per arces,
 Perque urbes & regna volat, malè notaque cogit
 Vincla pati fluvios, Francoque assuescere ponti,

Ite

Ite Duces, ferroque bonam decernite causam.
Usque adeone jacet virtus Germanica, & omnes,
Ut sua subducant venienti colla ruinæ,
Immemores sociorum & libertatis avitæ,
Alta pace latent, somno graviore sepulti?
Unus amor, nullum Patriæ præponere amorem,
Nec sibi, sed toti genitum se credere mundo,
Non aberit Numen. Iustis victricia causis
Arma capi certum est. ultores rectius enses
Stringuntur, cum fata premunt inimica superbos,
Et violens pœnas Rhamnusia poscit ab hoste.
Ite duces, ferroque bonam decernite causam:

Desierat, cunctosq; & sermo, & moverat Autor,
Incensisque novum recipit Dux os sibus ignem,
Et patuit Mavortis amor, fusoque rubore
Perque genas, perque ora internos prodidit æstus.
Nec mora: se GVELPHI expediunt (ô nata triumphis
Nominal) & ad Rhenum properant, quâ nobile tol-
Argentina caput, sedes ubi fata cruentas (lit
Bellonæ dederant. Sed non memorabimus illa,
Quæ vertente anno sensere in commoda Galli;
Quæque Ducum fortuna. Novissima prælia dicam,
Et majora aliis & cognoscenda nepoti.
Magnus adest, magnus rerum mihi nascitur ordo.

Hæc te-

Haëtenus invictis Gallus pugnaverat armis,
 Attonitoque orbi fatalem ostenderat ensem,
 Par similisque sibi. Sed justo examine coeli
 In se magna ruunt, & lætis Numina rebus
 Crescendi posuere modum. Furit impete Gallus,
 Involvitque orbem tenebris, gentesque quietem
 Desperare facit, bellique increscit ab usu,
 Crescit amor belli, famæque immensa cupido,
 Et nescit vix tanta modum, finemque tenere.
 Sic Hyrcana Tigris rubicundos lambere succos
 Cum coëpit, manet usque sitis, rabidoque receptus
 Ore cruor fauce arenti mansuescere nescit.

Interea fata accelerant, & tempora læta
 Teutoniæ latè oppressæ, Belgisque propinquant.
 Oceano primum (Oceanus namq; omnibus undis
 Tot palmis Batavo est desponsus, totque tropæis)
 Gloria parta venit, mox multa clade potenti
 Edomito tandem Tamesi, cessisse coacta est
 Sit triplici quamvis subnixa potentia sceptro.
 Nec minus ad fortis Groningæ mœnia fracta
 Deposuit Mimigarda iras, & nota Gradivo
 Infula Cæsareæ facta est devota coronæ.
 Mox belli ad Rhenum convertitur alea, & ipsa
 Pontificum sedes superatur Bonna, simulque

C

Reddi-

Redditur & Batavis libertas urbibus, & vix
Unius ad Mosæ trajectum Gallus adhæret.
Quæ tibi pro tantis debetur gloria rebus,
O LEOPOLDE? suos sentire Alemannia fructus,
Et desperatam perte sperare salutem
Incipit, ipsi etiam vicino à numine robur
Cattigenæ accipiunt, majoraque viribus audent,
Et jam antiqua redit timida in præcordia virtus.
Sic, ubi sunt caveis & parvo in carcere clausæ,
Deponunt irasque feræ, rictusque minaces
Moribus humanis mutant: Si redditur ori
Consuet⁹ cruor, hinc redeunt rabiesque, furorque,
Admonitæque iterum sitiunt nova vulnera fauces.

Nec tamen ad Mosæ tantum transmiserat amnē
Imperium Celta, & Lotharis regnabat in arvis,
Sed quoque bellaces Burgundi Lilia portis
Cernebant affixa suis, illa ampla Vesunti
Mænia, Vercellæ veteres, notæque Salinæ,
Mombosium, atque alię piscosi Dubidis arces,
Dolaque, juris honos quondam: quę lumine lævo
Vicinus Teuto atque iratus spectabat Iberus.
Ipsa etiam, celebri quę gaudet fonte Mosellę,
Urbs Augusta, antiqua, potens, habitataque divis
Cæsaribus, valido se subdere cogitur hosti.

Oma-

O malè vicinis hæc condita mœnia Celtis!
O damnata situ! quoties vis Gallica terram
Germanam invadit, cedunt infausta rapinæ.
O nimium addicte Imperio, fidissime TREVIR!
Austriacum foedus dum libertatis avitæ,
Et famæ, fideique tenax, relinquare nescis,
Externo sis præda, & muros cogeris intra
Digna indigna pati, & Dominis parere superbis.
Quis satis ah! mæstasque domos & diruta flammis
Tecta, laresque Deum, sævi spectacula Martis,
Dicere, condignoque queat describere versu?
Fallor? an illa dies veniet, quo libera plausus
Ingeminare Deo, atque hostem contemnere possis.
Jam tibi GVELPHIADÆ FRATRES, duo fulmina belli,
Adveniunt, validas & mittit BRVNO cohortes.
It simul, & certas monstrat Victoria palmas,
Quæ BRENNVM ad ripas Havelæ, quæ ad littora
Rheni

Cæsareos comitata apices. Jam lubrica vertit
Incertas fortuna vices. Fugientibus aufert
Causa animos, eademque novos victoribus addit.
Cernis, ut antiquo conjuncti fœdere Gothi,
Et soliti pugnare, & semper vincere sueti,
Robora nota pavent, & Brenni vindicis iras,

Obliquantque Sinus? Cernis nutare Trionum
Sidera, & egelidam vicinis motibus Arcton,
Et vitreum trepidare Albim, trepidare Visurgim?
O! vos, æterno qui gurgite vivitis amnes,
Et soli antiquo rectè meministis ab ævo,
Hæc arva, hæc magno quondam regnata LEONI,
Et nunc venturis eadem speratis ab annis,
Principibus GVELPHIS famulos advolvite fluctus.

Parte alia ad Rhenum de MONTE CVCVL-

LIVS Heros,

Unus, qui nobis cunctando restituit rem,
Fulminat, invictamque Aquilam, invictumque
Gradivo

Austriacum docet, An Latias tibi, Gallia, Cannas
Argentina dabit? Ticinus flebile quondam
Nomen erat, jam Rhenus erit. Viden', ordine verso
Ut Galli dubijque fuge, pugnaeque tenentur.
Jam sese adverso dederat TVRENNIVS hosti,
Tristisque infausto committitur omine pugna.
Fata instant, nimum Gallis inimica triumphis,
Et tormenta tonant, & magno maximus ictu
Dux cadit, & toties madefactam sanguine terram
Germanam proprio saturat, signatque cruore.
Hei mihi! qualis erat, quantum instar in ipso!

E

Qua-

Qualis gemma micans, fulvum quæ dividit aurum;
Aut collo decus aut capiti, mirabile visu:
Talis erat, nulli veterum virtute secundus,
Celtarum, occiduique illustris gloria mundi.
Non fortis, non ulla viri, non lædere dextra
Hunc Heroem ausa est. Perit, ceu fulminis ira
Magna solent. Homo non, homo non istum intulit
ictum,

Fortuna omnipotens, & inexorabile fatum.
Illum omnes Ararisque Deæ, rapidique Garumnæ
Et nemorum flevire Deæ: quin flumina fusis
Increvisse ferunt lacrymis. Ipsa æmula dudum,
Sed virtutis amans & in hoste, Alemannia flevit.
Aula Jovis Druidum longo jam syrmate luget
Extinctumque Ducem, & sortem metita sinistram
Spem vultu simulat, premit altum corde dolorem.

Qui procul illi autem, tanto fervore ruentes
In pugnam, ad trepidi flumen fatale Mosellæ?
Salvete Heroes, genus insuperabile bello.
Tuque prior, WILHELME, Patris generosa GEORGI
Et major soboles, celebris cui mænia Lynæ,
Et veteres parent Chauci, cui plurimus Albis
Servit, & haud uno jam ditior amne Visurgis.
Salve, ERNESTE, Decus Fratris, (nam lumina juncta

D

Recti-

Rectius illustrent) cui mitior obtulit Hæsa
Pontificale pedum, sed nunc patria arva tueri
Et pacis studio præponere bella negatæ,
Suadet amor recti, atque instans commune periclū
Tuque RVDOLPHE Heros, qui libertatis amore
Eminus arma moves, absensque in milite pugnas,
Et Generum Tibi substituis. Salve inclyte CIMBER,
Semideum genus, à Socero cui credita magno
Arma, & Saxonica pollens exercitus oræ.
Da fortuna fidem. Nunquam maiore triumphat
Vindice libertas. Cuncti se scire fatentur,
Fortunati omnes! Vos magna ex hoste tropæa,
Vos æterna manet venturis gloria seclis,
Dum populum latè regem, belloque superbum
Vincitis unanimes. In Vos non Patria tantum,
In Vos nunc oculos referunt contermina regna,
Occiduo sub Sole, & Septem nota Trionum,
Et nostro spectat semotior orbe Britannus,
Et populi ultra Alpes, Appenninumque nivalem,
Ipseque Roma anceps. Rerum cui summa potestas,
CÆSAR amat virtutem, & amica cingere lauro
Tempora vestra cupit, partoq; applaudere honori.

Salve magne parens vini frugumque Mosella,
Cæruleosque expande sinus: redit aurea tandem
Liber-

Libertas, fortisque manet te gloria pugnæ.
O! utinam, qui divitias & nobile littus,
Fæcundoque parem Nilo, Rhenoque Mosellam
Aufonius docto descripsit carmine Vates,
Ille mihi linguamque suam, sua commodet ora,
Et cultos números, & non imitabile flumen;
Te Te ego dulce sonante levarem ad sidera voce,
Ostendens cunctis populis, nec Sequana dives,
Nec præferre suos auderet Tibris honores.
Est locus, antiquo jam tum memoratus in ævo,
Et notus, Romane, tibi, quo fessa Saravus
Trevericæ Augustis advolvit flumina muris,
Et bis terna fremunt scopulosis ostia pilis.
Pons hodie à vico vicino GVNTZIVS audit,
Antiqui, vastique operis Hic prælia, & illam
Ingentem cladem Gallorum, & robora magna
Guelphorum, & cæsam vidit Mosella virum vim,
Ad se sanguineum miratus tendere Sarram.

Jam sese ad fossas Treveris collegerat acer
Guelphus, & undantes numerofo milite campi
Horrebant latè: nihil hîc nisi tela videres
Fulgida, & ingentes strictis mucronibus hastas,
Materiemque ignis, tædas, & sulphura, & omne
Mulciberi ingenium. Hîc oculos immania terrent

Tormenta, at mage miles. Eum spes certâ triumphî
Incitat, ostenditque diem, qui lætior urbem
Augustam Imperio, & domino transcribat avito.
Non tulit hoc Gallus, multas magnasque cohortes
Expedit, obsessisque jubet succurrere, & omni
Conatu hostiles arcere à mœnibus hostes.

It CREQUIUS, Lotharis bene notum nomen in oris,
Et Capitolinis notum Chisisque Jovique,
Selectasque secum ducit, veteresque phalanges,
Et fortes in Marte viros, animisque paratos,
Et cuncta imprudens, prædamque in prælia portat.
Quid tantum infano juvat indulgere labori?
Quo tendis periture? novus non cognitus hostis?
Nec venit in mentem, quorum confederis arvis?

Jamque dies suprema aderat, quâ gloria terræ
Teutonicæ claro affereret se lumine. Guelfi
Conveniunt, magnique animi, atque in utrumque
parati,

Ulcisci patriam, vel certæ occumbere morti.
Exitus acta probat, Proh! fata occulta, quis ille,
Quis fuit ille dies! Non unquam lætior alto
Sol fulsit cœlo: non unquam terra benigno
Læta sinu plures expandit dædala flores.
Pars nive, pars & purpureo se sanguine pingit,

Sola

Sola caput tristi defigunt LILIA trunco.
Nulla mora est: subito cœlum tonat omne fragore,
Et campi tremuere sono; jam pulvere belli,
Quantus Bistonio torquetur, turbine, fœdus
Inspicit, & crudus lambit sua vulnera miles.
Pro se quisque viri summa nituntur opum vi.
VICIMVS! haud unquam miti victoria cœlo
Tam placuit; tantum studijs adjuta Deorum est.
Intrepide pugnat Gallus, sed vincere nescit
Infelix: nullus sequitur de vulnere sanguis.
Quid faciat? quoniam Superis averſa voluntas.
Quis cladem illius lucis, quis funera verſu
Expediat? Flos ipſe cadit, quem Gallia lætum
Cultior heroo eduxit de ſemine, qualem
Vix ventura dabunt per multos ſecula curſus.
At mihi quis media dicat de plebe virorum
Nomina? quo ſe acies oculorum flexerat, illic
Vulguserat ſtratum: rubicundum ſanguine flumen
Mortua volvebat, volvebat corpora viva.
Atque aliquis pronò descendens navita fluctu
Funera dinumerare velit, ſed longa natantum
Obſiſtit ſeries, utque unda ſupervenit undam, ,
Corpora ſic denſata ruunt, ſeſeque premendo
Impediunt numerantem, & copia creſcit eundo.

E

Pars

Pars manet, at valido se dedere cogitur hosti:
Pars fugit, at fugientem inhonestum in tergo
vulnus

Impedit, accisoque remittunt poplite nervi.
Pars rupes, scopulosque, adituque carentia saxa,
Quaque est difficilis, quaque est via nulla, petendo
Teutonicas metuens iras evadere tentat.
Illi instant fugienti alacres, pedes impiger urget,
Urget eques, redeuntque instructi divite præda,
Instratosque ostro alipedes, pulcrosque tapetas,
Illusasque auro vestes, referuntque talenta.
Fictilibus solitus cænare argentea Chaucus
Vasa manu portat, seque admiratur in illis.
Credimus, an vastatum orbem, direptaque Belgæ
Oppida, & excisas Rhamnusia vindicat urbes,
Et veteres largo repetit cum fœnore prædas?
Sic magno oceano volitans piratica puppis,
Littoribus cunctis infesta, infesta carinis,
Et populata undas, & multis dives opimis,
Incidit in validam, bellatricemque triremem,
Et tandem fit præda, & captas reddere gazas
Cogitur, & lacerata sinus, viduataque velis,
Orba gubernaculis, antennis faucibus fractis,
Ludibrium ventis natat, & nova fabula nautis.

Sed

Sed jam majorum aggredior molimina rerum,
Et captam cantare urbem. Nam fœdere juncti
Successus urgere suos, instare favori
Numinis. Haud simplex laurus, haud gloria campo
Sufficiunt: sua vertit ovans ad mœnia victor
Signa, & Trevericæ minitatur fortior urbi.
Illa pavet, trepidatque, prior fiducia cesfit
Ignibus armari, & notos defendere muros.
Jam devictam urbem, jam dicere mœnia posses,
Nondum victus erat CREQVIVS; sed nixus in
hastam,

Infauftæque avidus pugnae sarcire ruïnam,
Vicinus, exclamat, si corda opponimus hosti,
Trevericasque vigil servat custodia fossas.
Parte alia impavidus circumfert lumina CIMBER,
Lumina Mavorti similis; flammantis ab ore
Scintillæ absistunt, oculis micat acribus ignis.
Hinc GVELPHI, totoque GEORGIVS impete fertur,
Invitans pretiis animos, & præmia ponens,
Nunc prece, nunc dictis virtutem accendit amaris.
Non mihi si numeros & magni verba Maronis
Ingeniumque Deus, totumque Heliconâ dedisset,
Omnia, vel lucis spatio vel noctis abactæ,
Persequerer: non me per fulgida tela, per hastas

Perque globos tonitruque & funera, perque favillas
Transversum rapere, & furialia prælia possum
Pandere. Vasta boant passim tormenta, volatque
Machina, quæ totos cum sanguine dissipat artus.
Hic referat robusta fragor, composta relaxat,
Altaque præcipitat. Flammis urgentibus Ætnam.
Undare, atque ignes credas spirare Typhœum,
Et cœlum ruere. Usque adeo crudelis ubique
Luctus, ubique pavorque, & plurima noctis imago,
Confuso armorum sonitu, gemituque cadentum.

Cedite fortunæ, Mavortia pectora, Galli,
Pugnatum satis est, perituræ parcite vitæ.
Tuque prior, Te, CREQUI, opera ad majora reserva.
Te talem, ac tantum titulis accedere nostris
Jusserunt Superi. Hoc ipso solabere fatum,
GVELPHORVM captivus eris. Si victor ovasti
Sub vario Marte, at solis te crede minorem
GVELPHIADIS, jactetque tuastua Gallia palmas,
Sed jam Teutonico superatum robore dicat,
Ergo cadit supplex: rubor attamen inficit ora
Igneus, atque genas, nec, qui solet esse timenti,
Pallor inest. Generosa Ducum clementia victum
Recreat, & medio veniam sibi sperat in æstu.
Impetrat: & magnæ Victoria sufficit iræ,

Magna

Magnanimoque hostem satis est prostrasse LEONI.

Vos animæ fortes, melioraque signa secutæ,
O! pubes domitura orbem, domitura profundū,
O! verè Germana manus! Quàm CÆSARIS aures
Excipient lætè felicia nuncia pugnæ,
Atque acri Gallo defensam fortiter urbem,
Ast à Germano concussam fortius urbem.
O divine Heros! quæ te tam læta, GEORGI,
Secula, quæ tanti talem genuere Parentes?
Maacte animo: nam te felicibus ire per altum
Auspiciis manifesta fides. Te respicit æquus,
Major agitque Deus, celsosque attollit ad ætus.
Illa Patri, illa Tuo toties molita triumphos
Jam præstat fortuna fidem. Te terra coronat;
Te nemus omne canet: Te culmine Bructerus alto,
Quamq; nivem nunquã potuit dissolvere Phœbus,
Lætitiæ excutiet. Tibi laxat Vesta recessus,
Et vario fundit se dives vena metallo,
Exultansque Albis, Dominique superbus honore
Lætitiæ dat signa suæ, & caput altius effert.
Allera vicinos quoque lætior excipit amnes,
Et sua Visurgi, dein mergit nomina Ponto,
Et quicumque latent ponto Divique, Deæque,
Nereides, Glaucus, viridisque examina Phorci,
Numina gratatura Tibi, sese æquore toto
Volvunt, mobilibusque docent sua gaudia pinnis.
O! quàm Te reducem vultu Tua LYNIS amico,
Plausuque excipiet! Pauper donaria Chaucus
Parva, sed ingentem testantia mittet amorem,
Non gemmas, non aurum, atque illa incognita Eoi

F

Pur-

Purgamenta maris, sed mella liquentia, ceras,
Infantis documenta cibi, cœlestia dona.

Ipsa recollectas expandit JULIA vires,
Acquirisque novas, & se mens enthea Vatum
Tollit humo, ut sacro pietatē in carmine monstret.
Salve Auguste Pater Patriæ: Dum tanta laboris
Cernere das documenta Tui, da cernere tandem
Posse Tuos nobis vultus. O' digna faventis
Cura DEI, ô cæli pignus! Sit fama parentum
Miratrix, nostrosque viros contemnere docta,
Pelidem tamen in nostro quoque cernimus ævo.
Per Te Teutonico rursus data gloria mundo,
Qui sibi venturæ blanditur pacis amore.
O rerum, pressæque salus Pax aurea terræ,
Et facer orbis amor! quam suspiramus ademptam,
Quam petimus votis. Jam Numina vidimus æqua,
Jam prope nos Superos. Positis sibi consulat armis,
Inque vices gens omnis amet, quæ nomine CHRISTI
Juncta, unum Dominum atque unum suspirat a-
morem.

Interea totum quâ circumvolvitur orbem,
Quâ Tamesis Ligerisque absorbet flumina Nereus,
Quâ Rhenus pater, & tantis Mosella triumphis
Lætior, Oceano victricia nomina mergunt,
GVELPHORVM claris memoretur gloria factis,
Palmis facta novis, & semper facta triumphis!

PRORECTOR ACAD. JULIÆ
MELCHIOR SMIDIUS
CIVIBUS ACADEMICIS

S. P. D.



*C*larum illud Principum domicilium: TREVIRIS, ob Romanorum Imperatorum ibi degentium & habitantium augustam præsentiam, Trevirorum Augusta dicta, non antiquissima solùm, sed etiam tam belli, quàm pacis artibus longè celeberrima urbs jamdudum fuit. Et quidem originem illius non ex fabulosis monachorum imperitorum Chronicis, quæ Trebetam Nini filium, vel Treverum, Mannogenitum, Alemannorum Regem, ejus conditorem ferunt, sed inde probatum imus, quod jam tum Imperante Julio Cæsare urbis conditione gavisa sit, & in antiquissima urbe Solodurenſi talis observata inscriptio;

Non est in Gallis Soloduro antiquior, unis

Excerptis Treveris, quorum ego dicta soror.

Imò quod originis vetustate ipsi Romæ parum, vel nihilquicquam cederet, idèò alteram Romam eam vocitatam esse autumant. Tacemus jam rudera, circos, statuas, fragmenta, aliaque plurima ultimam antiquitatem satis clarè testantia. Incolæ ejus Priscis illis Romanorum temporibus bellica laude & fortitudine videntur fuisse insignes, Quotidianis enim exercitiis bellis, nunquam imperata, nisi coacti exercitu fecerunt. Quamdiu nimirum vicinorum populorum excursionibus & præliis vel excitati vel coacti sunt, illorum fortitudo & generositas animi floruit. Cæterum ex quo loci amænitas, solique fertilitas invitavit Imperatores & Reges, ut ibi vel diutius commorarentur vel perpetuas sedes figerent, & civitas illa

Pacis ut in media gremio secunda quievit, moribus populi corruptis & per delicias fractis, sibi per clades plurimas exirium creavit. Constantinus enim Imperator, Constantius, Julianus, Valentinianus, Gratianus, & Valentinus; post hos Francorum Reges Theodoricus, Theodobertus, Clotharius & Sigebertus perpetuò, aut frequenter ibi sunt commorati. Præterea liberalium studiorum cultu perquam fuit celebris, imprimis circa tempora seculi à nato Servatore IVth. Quippe Gratianus, ut in Metropolitica urbe essent qui artes liberales publico salario docerent, constituens, Trevirensibus Professoribus aliquanto liberalius salarium solvi jussit. Eadem tempestate, Valente nimirum Imperante D. Hieronymum hujus urbis celebritas movit, ut, postquam Romæ jam variis artibus ac linguis addiscendis gnaviter operam dedisset, peragrata Galliâ Treviris diutius substitit, ibique inter alia, S. Hilarii librum de Synodis descripserit. Floruit ibi etiam Ursulus Grammaticus & Panegyrista, alique. Quinet hodiernum inter Germaniæ Academiæ, Trevirensis quædam recensetur. Populus autem ejus regionis jam tum priscis illis temporibus vel

Amma
Mascel. 6
v. p. 54r

Cæsar.
Comm.
bell. Gall.
lib. 1. c. 35r

Aufonius
de Trevir.
Salvian. de
gubern.
Dei lib. 10.

l. 11. c.
Theodol.
de Med. &
Prole.

Hier. Epist.
ad Florent.

Herman.
Hermes
Falc. Jur.
publ. c. 31.

origine Germanicus fuit vel Germanorum natione commixtus, inter-
que primos a Romanis ad Francos transiit, nec unquam postea ab Im-
perio Romano Germanico fuit separatus: imò urbs illa omnibus fere
commoditatibus a natura dotata sedem Archiepiscopo illius loci & Se-
ptemviro Imperii tranquillam pacatamque hæcenus præbuit; donec
aut ita pridem sine omni jure, quin & idoneo juris prætextu Ludovi-
cus Galliarum Rex eam occupavit. Verum enim verò, quantus tunc erat a-
nimorum tremor cum is fœderatorum Belgarum unitis Provinciis miræ ce-
leritate bonam partem suppressis, adeoque potentissimâ illâ florentissi-
maque Republ. propemodum subjugatâ, in vicinos, ac imprimis Impe-
rii nostri Serenissimos Electores ac Principes arma sua converteret, tan-
ta lætitia animos eosdem superioribus diebus subiit cum *Turennios* oc-
cisos, *Crequios* unâ cum *Trevirorum* urbe illa captos, *Condeos*que fugatos
esse nunciaretur. Quæ omnia, quia subito & præter plerorumque opi-
nionem, quasi miraculo quodam contigerunt, primò quidem ad De-
um nos convertimus, deinde quibus ille fortis dexteræ suæ instru-
mentis usus fuerit meritò consideramus. Gesta autem pleraque sunt con-
tra potentem illum hostem non sine Serenissimorum & potentissimo-
rum Ducum Brunsvicens. ac Lüneburgens. Dominorum nostrorum ele-
mentissimorum felicibus auspiciis. Quod sane non absque Divini Nu-
minis singulari directione ac providentia factum, ut Serenissima hæc
Ducum familia, quæ ad fovendos eruditos & promovenda liberalium
artium ac scientiarum studia, totiusque Reip. literarum incrementa faci-
enda, nihil non semper egit ac suscepit, illius Urbis, quæ & literarum stu-
diis semper floruit, & Imperii Germanici non ultima est portio, vindic-
cias pararet & obtineret. Ideoque cum hoc tempore Ecclesiæ nostræ
omnipotentissimo Numini submissa animi devotione pro auspiciatissi-
mis illis bellicis successibus ac victoriis gratias agant, nostrum quoque e-
rit Clementissimis nostris Nutritiis seorsum adplaudere. Et quoniam se-
renissimus Princeps ac Dominus, DN. GEORGIVS WILHELMVS Dux
Brunsvic. & Lüneburg. Dominus noster Clementissimus hodie suæ hujus
Academiæ Director Magnificentissimus, idem quoque hostium Imperii
Germanici est Victor ac Triumphator gloriosissimus, tam Serenitatis
ejus, quàm totius Herois Ducum Brunsvicens. ac Lüneburg. Domus salu-
tem Deo supplici prece porro commendare, & publica voce pro ejus
incolumitate, ex qua nostra omnium salus securitasque pendet, vota fa-
cere par erit. Eum in finem Vir Clarissimus, Apollinæ artis exasse heres,
non minus scilicet in pangendo carmine, quàm facienda medicina fel-
lix, Collega noster honoratissimus, Henricus Meibomius M. D. & P. P.
Ord. carmen Panegyricum, crastini finitis sacris publicis, in novo Ju-
leo recitabit. Nec rei gravitas & dignitas, nec Oratoris illius vobis satis
cognita suavitas desiderat, ut Vos, Cives optimi, operose ad auscultan-
dum invitem. Patriæ enim Vestræ amore, & eruditionis illius elegantis-
simæ, poëticæ, inquam, debita æstimatione ductos Vos frequentes ad-
ituros, & Deum pro continuandis prosperis successibus oraturos con-
fido. V. P. P. d. iv. Septemb. M D C LXXV.

F I N I S.

1802

2

957100



